

Kalaallit Nunaanni eqqartuussisarnermik inatsisip aamma pisortat ingerlatsinerat pillugu inatsisip allanngortinneqarneri pillugit inatsisissatut siunnersuutip (Allagaatinik takunnissinnaatitaaneq, pinerluttulerineq pillugu inatsiseqartitsineranut atatillugu eqqartuunneqarnissamut imaluunniit pillagassanngortitsinissamut suliassanngortitsineranut atatillugu politiinit, unnerluussisussaataitaasunit imaluunniit eqqartuussivinnit inuup kiffaanngissusianut pinngitsaaliilluni akuliunnerit aallartinneqarnerat, ilisimannittut kinaassusaasa isertuunneqarnerat aamma digitaliusumik nalunaarutiginninneq aamma piuminarsakkamik digitaliusumik nalunaarutiginninneq) Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut (Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Suliassa qarfiit qallunaat naalakkersuisa akisussaaffigisaasa sunniuteqarluartumik suliaqarfigineqarnissaasa ullutsinnullu naleqquttuunissaasa qulakkeerneqarnissaat Naalakkersuisunit annertuumik pingaartinneqarput. Pinerluttulerinermi sulianik suliarinnittarnerup pitsaanermik ingerlanneqarsinnaalernissaa, inatsisissatut siunnersuummi siunertarineqarpoq. Eqqartuussisarnermik inatsimmi allannguutissatut siunnersuutigineqartut politiinit eqqartuussivinnillu siunnersuutigineqarput taakkulu Naalakkersuisunit tapersorsorneqarput.

Ukiuni arlalinni ingerlareersuni qallunaat eqqartuussisarnermik inatsisaanni allannguutit arlallit atortussanngortinneqareersut, inatsisissatut siunnersuummi katersorneqarput. Taamaammat inatsisissatut siunnersuut manna annertooujussuuvoq aamma sammisat arlallit tassani pineqarput. Naalakkersuisut sinnerlugit immikkoortut toqqakkat, atituumik soqutigineqartut erseqqissaavigissavakka.

Annertunerpaamik isertuaatsuunissap aamma Kalaallit Nunaanni eqqartuussiviit sulinerannik paasisimasaqarnissap qulakkeerneqarnissaa siunertaralugu, tamat eqqartuussutit pillugit allagaatinik takunnissinnaatitaanerisa annertusarneqarnissaa inatsisissatut siunnersuutikkut siunnersuutigineqarpoq.

Ilisimannittut illersorneqarnerat pitsanngorsarniarlugu, politiit pinerluttoqarsimaneranik paasiniaanissamut periarfissaasa pitsanngorneqarnissaat, inatsisissatut siunnersuutikkut aammattaaq siunnersuutigineqarpoq. Allannguutit taakku immikkut ittumik ilungersunartunik aamma aqqissugaanerusunik pinerluttuliornerit akiorneqarnissaannut atorneqarneqassapput.

Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnissaq pillugu erseqqissunik inatsisini malittarisassanik ilanngussisoqarnissaa siunnersuutit ilagaat ataaseq. Nalunaarasuartaatinik sullissinermik suliaqarnermik tuniniaasartut, pasineqartup oqarasuaataata angallattakkap sumiissusersineqarsinnaanera pillugu paasissutissanik, inuup pasineqartup oqarasuaataanik angallattakkamik sumiissusersinnaasunik, tunniussinissamik politiit peqquneqarsinnaanerat, oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnertut isumaqarpoq. Aappaattut gps imaluunniit tekniskiusumik atortut assigisai ikiorsiullugit politiit inuup angalaanera nalunaarsorsinnaavaat. Taama iliornikkut politiit pinerluttoqarsimaneranik paasiniaanermut atatillugu piumasaqaatit immikkut ittut taaneqartut piumasaqaataatillugit, politiit namminneq najuutinngikkaluarlutik, inuup sumiinnera imaluunniit sumiissimanera pillugu paasissutissanik pissarsinnaapput. Oqarasuaatip angallattakkap ikumasup, pasineqartumit atorneqartutut isumaqarfigineqartup, sumiissusia pillugu paasissutissanik pissarsiniarnermik suliaqarnissamut politiit piumasaqaatit immikkut ittut malissavaat. Ilaatigut eqqartuussivimmit akuersissummik pissarsiniartoqaqqaasaaq aamma akuliunnermi pineqartumut illersuisumik ivertitsisoqassaaq.

Internettikkut nittartakkat, taakkuninnga qarasaasiaq atorlugu pinerluuteqarnernut ilutsit erseqqissumik taasat pillugit, politiit matusinissaat pillugit malittarisassat eqqunneqarnissaat aamma siunnersuutaavoq. Ilaatigut qarasaasiakkut pinerluttuliornermi eqqugaasinnaasut peqquserlunnernut, unioqutitsilluni allap qarasaasiaanut pulanernut il.il. illersorneqarnissaat siunnersuummi siunertarineqarpoq.

Aammattaaq ilisimannittut kinaassusaasa isertuunneqarnissaat pillugit malittarisassat eqqunneqarnissaat siunnersuutigineqarpoq. Unnerluunneqartumit imaluunniit inunnit ilisimannittumut attaveqartunit pillaatitut akiniutitut ilisimannittut illersorneqarnissaat siunnersuummi siunertarineqarpoq. Illersuisup ilisimannittup kinaassusia ilisimassavaa, aamma ilisimannittut kinaassusaat ilisarineqarsinnaajunnaarsillugu nassuiaateqartitsineq pillugu eqqartuussiviup aalajangiinera, immikkut aalajangeqqitassanngortinneqarsinnaavoq.

Naggataagut digitaliusumik nalunaarutiginnittarneq pillugu malittarisassat ilanngunneqarnissaat pillugu siunnersuut erseqqissaatigissavara. Siunnersuutip taassuma digitaliusumik attaveqarsinnaanermut periarfissat malunnaatilimmik pitsanngortissavaat. Taamaattoq taamaaliorsinnaanermut tekniskiusumik periarfissat inissippata, aatsaat digitaliusumik nalunaarutiginnissinnaanerup oqartussaasunit atorneqarsinnaalernissaa periarfissarilissavaat.

Taamatut oqaaseqarlutik immikkoortup Inatsisartuni suliarineqarnissaanut Naalakkersuisut tunniuppaat.